



Nacrt memoranduma o saradnji povodom situacije u NK Čelik Zenica

**Zenica
februar 2016. god.**

MEMORANDUM

O SARADNJI

na implementaciji zajedničkih aktivnosti povodom sanacije stanja
u NK Čelik Zenica između

Grad Zenica



NK Čelik Zenica



UG „Robijaši 1988 Zenica“



NGG „Za Čelik“



Zenica
februar 2016. god.

Strane potpisnice ovog Memoranduma planiraju zajedničku saradnju povodom provođenja niza mjera usmjerenih ka sanaciji organizacijsko-finansijskog stanja u NK Čelik Zenica. Strane su saglasne kako su ove mjere nužne kako bi se otpočeo proces spasa i oporavka ovog kluba te tako nastavila njegovati tradicija najstarijeg i najvećeg aktivnog sportskog kolektiva u Zenici.

Ovaj Memorandum o saradnji sklopljen je dana [DATUM] između :

1. **Grada Zenice**, Trg BiH 6, 72000 Zenica (u daljem tekstu: „**Grad**“) kojeg zastupaju gradonačelnik Husejin Smajlović i predsjednik Gradskog Vijeća Nebojša Nikolić,
2. **Udruženja građana „Nogometni klub Čelik“**, Bulevar Kulina bana bb, 72000 Zenica (u daljem tekstu: „**Klub**“) koje zastupaju predsjednik Komiteta za hitnost Nihad Pašalić i v.d. direktor Adnan Nuhagić,
3. **Udruženja građana „Robijaši 1988“**, [ADRESA], 72000 Zenica (u daljem tekstu: „**Robijaši**“) koje zastupaju [2 osobe],
4. **Neformalne grupe građana „Za Čelik“** (u daljem tekstu: **NGG „Za Čelik“**) iz Zenice, koju zastupaju predstavnici Tarik Ajanović i Haris Turkić.

I - PREDMET MEMORANDUMA

Član 1.

Predmet ovog Memoranduma je definisanje poslova, ciljeva i zadataka strana potpisnica Memoranduma čija je namjera odlučno provođenje niza mjera usmjerenih ka sanaciji stanja u Klubu, tj. NK Čelik Zenica.

II - NAČELA MEMORANDUMA

Član 2.

Strane potpisnice ovog Memoranduma saglasne su oko sljedećih polaznih i usaglašenih načela zajedničkog djelovanja koja su neupitna u ovom procesu:

- spas i oporavak Kluba je u interesu svih strana potpisnica ovog Memoranduma kao i šire društvene zajednice,
- spas Kluba je jedan od prioriteta u djelovanju lokalne društveno-političke zajednice koja se mora više aktivirati i doprinijeti oporavku kluba, a sve u okviru svojih mogućnosti,

- gašenje Kluba kao pravnog lica i slična manipulacija njegovim pravnim statusom su neprihvatljive opcije,
- zbog prevaziđenih ali i neefikasnih modela upravljanja, Klubu je potrebna temeljita statutarna reforma kroz demokratizaciju svog rada u okviru relevantnih zakonskih rješenja, a putem donošenja novog statuta na članskom osnovu,
- finansijski oporavak kluba se može značajno olakšati preusmjeravanjem sredstava Grada koje je do sada dotirao Klubu za tekuće poslovanje u reprogramiranje duga prema Poreskoj upravi FBiH,
- sportski rezultati na terenu nisu prioritet oporavka kluba u srednjoročnom periodu nakon provođenja usaglašenih mjera no treba stremiti ostanku u istom rangu takmičenja,
- svi dogovori ustanovljeni ovim Memorandumom kao i eventualnim naknadnim aktima u pismenoj formi imaju se smatrati obavezama za sve strane potpisnice, kao i fizičke osobe koje su ih potpisale koje imaju djelovati u okviru svojih zaduženja i
- svi dogovori ustanovljeni ovim Memorandumom imaju se provoditi u što kraćim rokovima bez daljeg odlaganja imajući u vidu trenutno stanje u Klubu.

II CILJEVI MEMORANDUMA

Član 3.

Strane su se sporazumjele da će zajednički raditi na sanaciji stanja u Klubu kao i na daljem nastavku njegovog oporavka radi održavanja njegovog neprekidnog djelovanja ali i na vraćanju povjerenja od strane građana kao njegovih navijača i simpatizera.

Također, radit će i na ostalim aktivnostima usmjerenim ka intenzivnijem oživljavanju cjelokupne povezanosti Kluba sa svojom lokalnom zajednicom i stvaranju samoodrživog profesionalnog Kluba koji u budućnosti neće zavisiti od finansijske podrške Grada.

Član 4.

Sve aktivnosti i obaveze imaju za cilj da u što kraćem roku otpočinu proceduru sanacije Kluba te mu tako daju čvrst temelj za njegovo buduće djelovanje.

III – ODGOVORNOSTI I OBAVEZE

Član 5.

Grad Zenica se kroz potpisivanje ovog dokumenta obavezuje da će:

- obezbijediti finansijska sredstva za sanaciju duga Kluba prema Poreskoj upravi FBiH u zvanično utvrđenom iznosu glavnice utvrđenom od strane Poreske uprave FBiH i to u što kraćem roku, a ne dužem od 60 (slovima: šezdeset) dana od dana potpisivanja ovog Memoranduma,
- izvršiti transfer sredstava za sanaciju duga iz prethodnog stava na zvanično određeni račun Poreske uprave FBiH te tako zvanično i otplatiti kompletnu glavicu duga Kluba,
- sazvati i održati tematsku sjednicu Gradskog vijeća Grada Zenice na kojoj će raspraviti sve moguće moduse nefinansijske podrške Grada Klubu kao i dugovanja Kluba prema javnim preduzećima pod kontrolom Grada, istovremeno usvajajući strategiju za provođenje tih planova,
- obnoviti ugovor između Grada i Kluba o korištenju stadiona „Bilino polje“ po istim ili povoljnijim uslovima,
- po usvajanju novog statuta Kluba redovno imenovati svoje kandidate za Nadzorni odbor Kluba koji će savjesno obavljati svoje zadatke u Klubu,
- pružati Klubu institucionalnu pomoć u njegovim razvojnim projektima kao i u aktivnostima koji uključuju prekograničnu saradnju, a naročito u ostvarivanju kontakata sa inostranim sponzorima, investitorima i partnerima.

Član 6.

Klub se obavezuje da će:

- od Poreske uprave FBiH hitno obezbijediti zvanični iznos svojih dugovanja te ga dostaviti Gradu kao i predstavnicima medija,
- obezbijediti svu potrebnu pomoć i saradnju Gradu u procesu reprogramiranja duga prema Poreskoj upravi FBiH,
- po završetku procedure reprograma poreskog duga učiniti sve potrebne napore da sa svoje strane obezbijedi održavanje prekinute 7. redovne sjednice Skupštine Kluba,
- javno pozvati javnost, a pogotovo članove Skupštine Kluba da daju podršku novom statutu Kluba na članskom osnovu koji je trenutno u proceduri,

- nakon usvajanja statuta na članskom osnovu, na istoj sjednici uputiti Skupštinu da imenuje privremeni Upravni odbor sa mandatom do prvih demokratskih izbora u Klubu, a koji nije duži od 6 (slovima: šest) mjeseci,
- pokrenuti proceduru učlanjivanja novih članova Kluba po usvajanju novog statuta na način propisan tim aktom poštujući sve postavljene rokove i procedure,
- raspisati javni konkurs za pozicije u Radnom tijelu Skupštine, Nadzornom odboru i Upravnom odboru nakon usvajanja novog statuta gdje će članovi kluba birati kandidate na klupskim demokratskim izborima,
- organizovati prvu sjednicu Skupštine po novom statutu u skladu sa rokovima i procedurama utvrđenim u istom,
- prihvatati vanjsku pomoć koju mu obezbijede navijačka grupa „Robijaši“ i NGG „Za Čelik“.

Član 7.

Navijačka grupa „**Robijaši**“ se obavezuje da nakon reprograma duga i usvajanja novog statuta:

- prekinuti bojkot domaćih utakmica,
- raditi na omasovljavanju i ojačavanju podrške Klubu na domaćim utakmicama od čega će Klub imati direktnu finansijsku korist,
- aktivno raditi na podizanju atmosfere u gradu i navijačko-simpatizerskih osjećaja ka Klubu,
- kontinuirano provoditi kampanju masovnog učlanjenja u Klub kako bi se obezbijedila nova finansijska sredstva za njegovo funkcionisanje, kako prema svom članstvu, tako i prema svim građanima,
- uzdržavati se od svih oblika djelovanja i ponašanja koji će Klubu onemogućavati provođenje utvrđenih ciljeva.

Član 8.

NGG „Za Čelik“ se obavezuje da će nakon reprograma duga i usvajanja novog statuta:

- aktivno raditi na podizanju atmosfere u gradu i navijačko-simpatizerskih osjećaja ka Klubu,
- kontinuirano provoditi kampanju masovnog učlanjenja u Klub kako bi se obezbijedila nova finansijska sredstva za njegovo funkcionisanje, kako prema svom članstvu, tako i prema svim ostalim građanima,
- raditi na omasovljavanju i ojačavanju podrške Klubu na domaćim utakmicama od čega će Klub imati direktnu finansijsku korist,
- obezbijediti idejno grafičko, finansijsko i proceduralno rješenje za Klub glede učlanjivanja članova po novom statutu,
- kontinuirano pružati Klubu profesionalnu pomoć iz oblasti prava, marketinga i strateškog planiranja kao i drugu potrebnu stručnu pomoć po potrebama Kluba i to isključivo na *pro bono* osnovi, gdje se ovi odnosi mogu regulirati i zvaničnim ugovorom između pojedinaca i/ili novoformiranog udruženja građana „Za Čelik“, o čemu odlučuje Klub,
- obezbijediti komunikaciju i saradnju sa organizacijom Supporters Direct Europe i svim klubovima mreže, kao i ostalim pratećim organizacijama od interesa za Klub,
- aktivno raditi na organizaciji međunarodnih utakmica i turnira u Zenici između Kluba i klubova članova mreže Supporters Direct Europe,
- koristiti svoje profesionalne i lične kapacitete i kontakte da klubu obezbijedi nove izvore finansiranja kroz sponzorske ugovore,
- predati Razvojni plan kluba njegovom rukovodstvu te pružati *pro bono* savjetodavnu pomoć u provođenju istog,
- obezbjeđivati finansijska sredstva za pojedine razvojne projekte kluba iz Razvojnog plana Kluba.

Član 9.

Strane se obavezuju da će radnje koje se definišu Memorandum o saradnji provoditi koordinirano, na zakonit način, vodeći računa o pravima i položaju strana pojedinačno i zajednički o čemu će, ukoliko to zahtijevaju posebni propisi, zaključivati neophodne sporazume, protokole ili druge pravne poslove koji dovode do realizacije namjeravanih aktivnosti.

Član 10.

Strane su saglasne da će se u provođenju radnji i aktivnosti ovog Memoranduma uzdržati od bilo kojeg oblika nesavjesnog ili nezakonitog djelovanja, te da će u slučaju poduzimanja takvih radnji od strane bilo koje Strane upozoriti na takvo djelovanje, a ukoliko se Strana koja je poduzela takvu radnju od iste ne uzdrži, upoznati javnost i nadležne organe o tome.

Član 11.

Strane su saglasne da se uzdrže od svih oblika javnih ili drugih istupa koji bi mogli nanijeti štetu ili negativno utjecati na radnje i aktivnosti definisane ovim Memorandumom, odnosno da će o svim poduzetim radnjama usaglašavati način, područje i oblik obavještavanja javnosti o provođenju aktivnosti.

IV – ODGOVORNOST

Član 12.

U slučaju neizvršavanja obaveza od strane Grada i Kluba te neadekvatnog provođenja usaglašanih aktivnosti, navijačka grupa „Robijaši“ i NGG „Za Čelik“ će nastaviti borbu za svoje programske ciljeve drugim demokratskim sredstvima o čemu su Grad i Klub upoznati putem ovog Memoranduma.

Član 13.

U slučaju nepoštivanja dogovora ustanovljenim ovim Memorandumom, navijačka grupa „Robijaši“ i NGG „Za Čelik“ će se okrenuti sljedećim aktivnostima, a o kojima ovim Memorandumom, obavještava Grad i Klub:

- nastavak ili ponovno uspostavljanje bojkota domaćih utakmica Kluba,
- aktivni rad na ukazivanju nepravilnosti u Klubu kroz vlastita i javna sredstva informisanja,
- organizovanje tematskih skupova sa osobama iz javnog, poslovnog, političkog i sportskog sektora,
- održavanje redovnih mirnih građanskih protesta usmjerenih protiv rukovodstva Kluba i Grada, kako zbog nepoštivanja dogovora iz ovog Memoranduma, tako i zbog prethodnih neriješenih pitanja,
- pokretanje zakonom utvrđene građanske inicijative prema nadležnim tužilaštvima i drugim nadležnim organima za pokretanje istražnih procesa iz oblasti privrednog kriminala,

- pokretanje upravnih postupaka i/ili sporova kod nadležnih upravnih i/ili sudskih organa glede povreda odredbi Zakona o udruženjima i fondacijama FBiH od strane Grada i Kluba,
- javna finansijska analiza i due-dilligence svih finansijskih izvještaja Kluba, a pogotovo u slučaju predstojećih izmjena Zakona o udruženjima i fondacijama FBiH u zakonodavnoj proceduri.

V – ZAVRŠNE ODREDBE

Član 14.

Ovaj Memorandum stupa na snagu dana [DATUM] potpisom i ovjerom od strane ovlaštenih predstavnika strana u Memorandumu i predstavlja slobodno izraženu volju strana i obavezuje strane samo i isključivo ukoliko nije protivan prinudnim propisima.

Član 15.

Strane su saglasne da ovaj Memorandum čini sveobuhvatnu osnovu za realizaciju zajedničkih aktivnosti.

Član 16.

Ovaj Memorandum o saradnji sačinjen je u 8 (osam) istovjetnih primjeraka na BHS jeziku od kojih svaka strana zadržava po 2 (dva) primjerka.

Grad Zenica

Husejin Smajlović, gradonačelnik

Nebojša Nikolić, predsjednik Gradskog vijeća

UG „Nogometni klub Čelik“ iz Zenice

Nihad Pašalić, predsjednik Komiteta za hitnost

Adnan Nuhagić, v.d. direktor

UG „Robijaši 1988“ iz Zenice

Robijaši 1

Robijaši 2

NGG „Za Čelik“ iz Zenice

Tarik Ajanović, predstavnik

Haris Turkić, predstavnik
